


Cúrsaí Spóirt

Ceist 1: Beidh tú ag féachaint ar ball ar thuairisc faoin aighneas atá idir iománaithe Chorcaí agus Gerald McCarthy. Sula bhféachann tú ar an tuairisc, déan na ceisteanna seo a phlé leis an duine an aice leat.

An bhfuil mórán eolais agat maidir leis an aighneas/ troid seo?
An bhfuil an ceart ag na himreoirí dar leat?

Ceist 2: Féach ar an tuairisc anois agus déan iarracht an crosfhocal thíos a chomhlíonadh. Tá na leideanna as Béarla agus na freagraí as Gaeilge.

Trasna	Anuas
1. Panel (7)	2. Hurling (7)
4. Players (8)	3. Tipperary (8,5)
7. Manager (11)	5. Cork (8)
8. Strike (6)	6. Streets (10)
9. Committee (6)	
10. Tomorrow (7)	
11. Team (8)	
12. Dublin (5, 4, 6)	



Ceist 3

Freagair na ceisteanna seo a leanas trí éisteacht leis an mír arís.

1. Cén fhoireann iomána a bhfuil caint uirthi anseo?
2. Cén t-ainm atá ar an mbainisteoir atá acu?
3. Cén fhoireann a d'imir in aghaidh Chorcaí inné?
4. Cén fhoireann a imreóidh in aghaidh Chorcaí an tseachtain seo chugainn?

Ceist 4:

Seo alt ón mír nuachta. Déan iarracht an t-alt a athrú go dtí an aimsir fháistineach.

Rinne an fhoireann forbartha atá anois ag feidhmiú mar fhoireann Chorcaí a ndícheall. Bhí a mbainisteoir agus an slua de dhá mhíle duine nó mar sin a tháinig amach chun tacú leo bródúil astu, ach má d'éirigh le Baile Átha Cliath naoi bpointe de bhearna a bheith acu inné orthu, is féidir a bheith ag súil go ndéanfaidh Tiobraid Árann scrios ceart orthu i nDurlas Éile an tseachtain seo chugainn. Bhí suas le dhá mhíle dhéag duine ar shráideanna Chorcaí arú inné, iad ag máirseáil ar son phainéal na bliana seo caite atá ar stailc, a shé oiread sin is a bhí i bPáirc Uí Chaoimh inné le tacú le foireann McCarthy.

Ceist 5:

Déantar caint sa mhír faoi fhoireann iomána. Bíonn cúig dhuine dhéag ag imirt ar an bpáirc. Ag féachaint ar an léaráid, déan iarracht na focail ar chlé a cheangal leis na focail ar dheis.

		1.	
2.	3.		4.
5.	6.		7.
	8.	9.	
10.	11.		12.
13.	14.		15.

1. Goal Keeper	A. Lánchúlaí
2. Right Full Back	B. Lántosaí
3. Full Back	C. Lánchúlaí Clé
4. Left Full Back	D. Cúl Báire
5. Right Half Back	E. Leatosáí Láir
6. Centre Half Back	F. Lár Páirce
7. Left Half Back	G. Lántosaí ar Dheis
8. Midfield(1)	H. Leathchúlaí Láir
9. Midfield(2)	I. Leatosáí Clé
10. Right Half Forward	J. Leathchúlaí ar Dheis
11. Centre Half Forward	K. Lánchúlaí ar Dheis
12. Left Half Forward	L. Lár Páirce
13. Right Corner Forward	M. Leatosáí ar Dheis
14. Full Forward	N. Leathchúlaí Clé
15. Left Corner Forward	O. Lántosaí Clé.

Ceist 6: Pléigh na ceisteanna seo leis an duine in aice leat nó le do ghrúpa
An bhfuil suim agat sa spórt? An mbíonn tú féin ag imirt
iománaíochta/camógaíochta? Céard iad na caithimh aimsire atá agat
féin?

Treoracha agus freagraí

Ceist 1: Is féidir an plé seo a dhéanamh i mbeirteanna nó i ngrúpaí.

Ceist 2: **Trasna:** 1, Painéal; 4, Imreoirí; 7 Bainisteoir; 8, Stailc; 9, Coiste; 10, Amárach; 11, Foireann; 12, Baile Átha Cliath. **Anuas:** 2, Iomáint; 3, Tiobraid Árann; 5, Corcaigh; 6, Sráideanna.

Ceist 3:

1. Foireann Iomána Chorcaí atá i gceist anseo.
2. Gerald McCarthy is ainm don bhainisteoir.
3. D'imir foireann Chorcaí in aghaidh Bhaile Átha Cliath inné.
4. Imreoidh siad in aghaidh Thiobraid Árann an tseachtain seo chugainn.

Ceist 4

Déanfaidh an fhoireann forbartha atá anois ag feidhmiú mar fhoireann Chorcaí a ndícheall. **Beidh** a mbainisteoir agus an slua de dhá mhíle duine nó mar sin **a thiocfaidh** amach chun tacú leo bródúil astu, ach má **éireoidh** le Baile Átha Cliath naoi bpointe de bhearna a bheith acu **amárach** orthu, is féidir a bheith ag súil go ndéanfaidh Tiobraid Árann scrios ceart orthu i nDurlas Éile an tseachtain seo chugainn. **Beidh** suas le dhá mhíle dhéag duine ar shráideanna Chorcaí arú **amárach**, iad ag máirseáil ar son phainéal na bliana seo caite atá ar stailc, a shé oiread sin is a **bheidh** i bPáirc Uí Chaoimh **amárach** le tacú le foireann McCarthy.

Ceist 5

1=D
2=K
3=A
4=C
5=J
6=H
7=N
8=F
9=L
10=M
11=E
12=I
13=O
14=B
15=G

Ceist 6

Is féidir leo na ceisteanna seo a phlé i mbeirteanna nó mar ghrúpa.

Cúrsaí Spóirt anois, agus beidh le feiceáil amárach, cén tionchar a bheidh ag imeachtaí na¹ deireadh seachtaine i gCorcaigh ar an aighneas atá idir Gerald McCarthy agus painéal iomána na bliana seo caite. Arú inné, mháirseáil os cionn deich míle duine sa chathair² ag tacú leis na himreoirí atá ar stailc agus inné, buaileadh ar³ fhoireann McCarthy sa tSraith Náisiúnta. Tá tuairisc ag Ruairí Mac an Iomaire.

Bhí Baile Átha Cliath lag i bPáirc Uí Chaoimh inné, fós féin, bhí siad i bhfad ró-láidir d'ógánaigh Gerald McCarthy.

Rinne an fhoireann forbartha atá anois ag feidhmiú mar fhoireann Chorcaí a ndícheall. Bhí a mbainisteoir agus an slua de dhá mhíle duine nó mar sin a tháinig amach le tacú leo bródúil astu, ach má d'éirigh le Baile Átha Cliath naoi bpointe de bhearna a bheith acu inné orthu, is féidir a bheith ag súil go ndéanfaidh Tiobraid Árann scrios ceart orthu i nDurlas Éile an tseachtain seo chugainn. Bhí suas le dhá mhíle dhéag duine ar shráideanna Chorcaí arú inné, iad ag máirseáil ar son phainéal na bliana seo caite atá ar stailc, a shé oiread sin is a bhí i bPáirc Uí Chaoimh inné le tacú le foireann McCarthy. Agus beidh sé suimiúil cén tionchar a bheidh aige sin, má tá tionchar ar bith aige ar ionadaithe na gcumann ag cruinniú Choiste Chontae Chorcaí san oíche amárach. Dúirt Cathaoirleach an Choiste sin, Gerry O'Sullivan le Nuacht TG4 tráthnóna nach bhfuil aon réamh-fholáireamh faighte fós acu i dtaobh rúin mhímhuiníne ná rúin ar bith eile ach an oiread a bheadh le moladh ag an gcruinniú sin ach dúirt sé nach shin le rá nach sroichfí a leithéid de rún fós mar gur féidir a leithéid a mholadh ón urlár. Níl dabht ar bith ach go bhfuil toradh chluiche an lae inniu agus an líon daoine a mháirseáil ar an Satharn ag cur go mór lena gcás siúd atá ar stailc agus ag méadú an bhrú ar McCarthy agus ar an gCoiste Chontae.

Ruairí Mac an Iomaire, Nuacht TG4.

1 an deireadh seachtaine a deirtear

2 sa gcathair a deirtear

3 buaileadh foireann a deirtear